



GKMB y un grupo di expertonan ta trahando hunto pa logra haya diagnosticonan corecto

Dr. Wilmer Salazar ta splica cu e rash ta bin cu masha poco sintoma

TANTEN cu e investigacion ta tumando luga, ta pidi pa sigui inspecta curanan di cas y den cas, como tambe rond y den negoshinan pa posibel criadero di sangura y pa elimina esakinan, director di DVG, esta Jerry Staring a bisa enfaticamente.

El a comenta cu tin un grupo di experto den e Vector Action Team cu ta consisti di personal di GKMB, personal medico, expertonan di laboratorio, expertonan riba tereno di enfermedadnan contagioso ta trahando hunto pa logra haya sa mas y haya un diagnosis corecto di e casonan di e fever-rash syndrome.

Pero sea cua sea e origen, ta esencial pa comunidad sigui alerta pa eliminacion di criadero como cu si e ta transmiti pa sangura of no, hecho ta cu a yobe hopi ultimamente y no por perde for di bista cu aedes aegypti tin un impacto negativo den nos comunidad, y ta hunto cu cada miembro di comunidad, cu yudansa di cada residente di nos isla, so lo yega na e miho control di e indexnan.

Dr. Wilmer Salazar a splica cu e rash ta bin cu masha poco sintoma, e ta cuminsa na e cara of e pecho y ta sigui plama; e ta grawata. E keintura ta suave, no mucho halto y pashentnan tambe ta sinti un tiki dolor di curpa of joints. E sintomanan ta dura apenas tres pa cinco dia y despues e persona ta bira bon. Loke ta preocupa ta cu e sintomanan ta similar na e virusnan causa pa sangura. Ta mirando mas den e direccion di Zika como cu no ta presenta sangramento y otro complicacion cu ta bin cu dengue, Salazar a añadi.

Pero, mester agrega cu e sintomanan tambe por ta indicacion di afliccionnan manera Parvo Virus, Rubella, Measles, etc. y mester sigui haci investigacion pa determina exactamente kico e ta.

Dr. Salazar tambe ta subraya e importancia di control di e cantidad di sangura cu ta transmiti e virusnan ya conoci. Mester sigui cu e lucha contra e sanguranan di pata preto/blanco.

El a splica cu den tur caso mester preveni e presencia di Zika, como cu e ta un virus cu ta trece problema grandi cun'e como cu e ta "neurotropo", pues e ta afecta e celnan di e cerebro, cual por tin cierto consecuencia. Ta comenta tocante di Microcefalia, pero tin otro daño na cerebro cu por tuma luga tambe cu no ta Microcefalia y nan no por wordo detecta na tempo.

E team di DVG ta trahando duro pa combati e problematica aki, Staring a expresa.

Conscientisacion encuanto di e situacion ta sigui, como tambe conscientisacion encuanto di eliminacion di criadero. E situacion cu ta reina bao di e poblacion berdad ta trece un poco stress y miedo, pero dokternan y e sistema di salud na Aruba ta bon y ta pidi pa tur pashent y dokternan sigui meld e condicion aki pa por yega na un diagnosis corecto.

DVG ta pidi dokternan di cas y laboratorionan pa sigui notifica DVG y pa pashentnan sigui meld na nan dokter.

E situacion cu ta reina bao di e poblacion ta trece un poco stress y miedo, pero nos dokternan y e sistema di salud ta bon.

Ta atendiendo cu e situacion aki cu hopi seriedad pa asina logra un Aruba cada dia un poco mas saludabel y un poco mas sigur. VAT: Vector Action Team.

Aruba su Vector Action Team, esta VAT ta un grupo di trabao y plataforma importante cu ta envolbe tur grupo di interes (stakeholder) den e proceso pa combati malesanan transmiti pa sangura. VAT ta dialoga y sincronisa datonan di unda a haya criadero y unda tin casonan sospechoso y/of confirma pa por traha di un forma eficiente y profesional basa riba informacion adkiri y colecta. VAT ta basa riba e maneho recomenda pa Pan American Health Association (PAHO)/ World Health Organization (WHO) pa cu e maneho integra di vector (sangura cu ta transmiti un virus), esta "integrated vector management".

Combatiendo di sangura ta mundialmente un di e luchanan mas grandi y dificil pa salud publico. E ta un problematica mundial, como cu e sangura ta adapta relativamente facil na diferente medio ambiente, y ta sigui transmiti virusnan di pais pa pais, region pa region. E problema aki tin hopi atencion di PAHO/WHO practicamente tur parti di mundo.

Aruba su capacidad pa combati sangura ta reconoci den nos region como un di e mihonan, y como isla mester tin confiansa y ta orguyoso di e trabao duro cu inspectornan di GKMB ta eherce tur dia, y e tremendo cooperacion entre departamentonan cu ta haci esaki posibel, Clayton Croes a conclui bisando.



No tin confirmacion cu ta Zika

DVG ta traha cu tur partner di cerca pa haya sa causa exacto di “fever-rash syndrome”

TIN un “fever-rash syndrome” cu ta bay rond na Aruba pa cual ainda no tin confirmacion kico e causa ta. Directie Volksgezondheid tin diferente sospecho, pero no tin confirmacion di unda e virus aki ta origina y si acaso e ta “vector-borne”, esta si e ta transmiti pa sangura, of no.

Ta asina cu dor di awacero frecuente y fuerte na fin di 2016 y na cuminsamento di 2017 e index di presencia di e vector (sangura cu ta transmiti virus) aedes aegypti tabata mas halto cu e nivel cu ta custumbra di wak den e periodo aki. Na januari e index tabata haltisimo, hefe interino di GKMB, esta Clayton Croes a declara diamars, esaki tabata di spera tambe pa via di e yobida. Ultimamente e indexnan ta bahando significantemente, y esaki sigur ta bon noticia, el a agrega.

E ta conclui cu e trabaonan tumando luga tin nan fruto, y sigur e notificacionnan cu DVG ta ricibi di dokternan di cas di casonan sospechoso di dengue, chikungunya y zika ta duna un excelente indicacion di cua areanan mester bishita cu mas urgencia y haci trabaonan di eliminacion di criadero y posibel criadero.

Croes ta splica cu tin un protocol cu ta na vigor continuamente den temporada di yobida.

E momento cu dreña un melding cu tin un caso cu e dokter ta sospecha cu e por ta un di e malesanan transmiti pa sangura, GKMB ta haci inspeccion di e cas unda e persona ta biba y di 3 pa 4 cas (radius di 100 meter) rond di e cas notifica, tanto dilanti, patras como na banda. Si haya criadero activo ta fumiga manera ta indica den e plan nacional.

Casonan confirma di Zika: 27.

For di januari pa e fecha actual, Aruba a conoce 27 caso di Zika confirma, sero caso di Dengue confirma y nueve caso di Chikungunya confirma, segun Maribelle Tromp, epidemiologo na D.V.G.

Loke a ripara den e ultimo lunanan ta cantidad cu ta keda halto di notificacionnan semanal ricibi for di dokternan di cas di pashentnan

cu ta bin cu un rash, keintura, y iritacion na wowo. E cantidad di pashent a yega na un nivel cu ta preocupa DVG, y tin investigacion tumando luga pa purba di yega na un conclusion lihe di kico exactamente ta pasando.

DVG ta pidi dokternan pa sigui notifica nan di tur caso, pa asina por sigui investiga pa e causa, Tromp a subraya. El a agrega cu ta trahando di cerca cu tur laboratorio na Aruba tambe pa haya mas informacion y yega mas pronto posibel na un confirmacion.

Tin hopi caso sospechoso pa loke ta e “fever-rash syndrome” segun e ultimo datonan epidemiologico, un total di 619, pero ainda no tin un conclusion di exactamente kico tur ta.

Na Corsou Zika ta circulando y tabatin un cantidad grandi di caso entre october y november ultimo, na Boneiro tambe tabatin mas caso di Zika, y ta pensando den e direccion aki pa cu e syndrome detecta na Aruba, pero haya confirmacion ta dificil.

Zika ta un malesa relativamente nobo y ta dificil pa haya confirmacion cu testnan comercial como cu nan ta hopi nobo, ademas prome cu confirma cu e casonan actual ta Zika mester tambe descarta cu por ta cualkier otro virus.

Tromp a splica cu mayoria notificacion ta bin di e area pariba di Aruba, esta San Nicolas, Savaneta y Pos Chikito, pero cu e syndrome ta presente den tur bario y notificacionnan ta dreñando di tur bario, y por mira cu e ta moviendo pabao.

DBZ, Dienst Besmettelijke Ziektes, ta haciendo un investigacion cu ta encera monitor tambe e adresnan unda cu e pashentnan ta biba pa tin un miho idea di e barionan, pero asina mes, no kiernen cu ta den su mesun bario e malesa a origina.

Consecuentemente ta pidiendo pashentnan pa duna nan dokter di cas mas informacion tocante di unda nan ta traha, y frecuente, si nan a sinti malo despues di a bishita un cierto luga, of tabata den un cierto situacion. Esaki ta yuda DBZ cera e buracan den informacion cu nan tin caba y kisas por conduci mas lihe na haya e origen di e syndrome.